

片也全編巻五

節

C40
4514
137

5
6
7
8
9
80
1
2
3
4
5
6
7
8
9
90
1
2
3
4
5
6
7
8
9
100
1
2
3
4



67898012345678990123456789100123456

440-4514

了翁上座諸大猷及有
家書置之為刻其書山
我微不勝隨所中未
為學子者不敢言其
當山二非鐵牛機證



D. 64853

佛地經論卷第五



親光等 菩薩造

唐三藏法師玄奘奉詔譯

經曰又如圓鏡周瑩其面於一切處為諸影像徧起
依緣如是如來大圓鏡智不斷無量衆行善瑩為諸
智影徧起依緣謂聲聞乘諸智影像獨一覺乘諸智
影像無上大乘諸智影像為欲令諸聲聞乘人依聲
聞乘而出離故獨一覺人依獨覺乘而出離故大乘
之人依無上乘而出離故
論曰云何一智於一切時能生三乘一切智等諸法

論

佛地經論卷五

七

影像釋此難言又如圓鏡周瑩面等如世圓鏡爲徧於中現其面等一切影像種種加行周瑩其面前後兩邊於一切處普能爲緣現一切影鏡智亦爾一切如來爲菩薩時雖有種性而爲障覆未能現起爲徧於中生起三乘一切智等諸法影故精勤修習不斷無量衆行善瑩金剛喻定現在前時離一切障清淨圓滿徧能生起三乘智等一切影像不斷就方無分限故無量就時無量時故此言因位徧一切處於無量時勤修衆行除障善瑩大圓鏡智能生三乘智等影像又卽鏡智徧處恒時離諸垢穢種種行德圓滿

莊嚴極圓淨故一切處時能起諸影如說殊勝金剛喻定斷一切障證得如來大圓鏡智種種功德圓滿莊嚴於一切處又無量時能起三乘一切影像此中意說各別善根成熟差別勝道生時大圓鏡智或近或遠隨其所應爲作強緣決定種性各依自乘而得出離不定種性或依大乘或依餘乘而得出離言出離者卽是涅槃諸三乘人用自種性以爲因緣如來鏡智爲增上緣精勤方便修集資糧引生聖道除煩惱障及所知障隨其所應名證涅槃決定種性聲聞獨覺住無學位樂寂滅故發業潤生諸煩惱障永滅

除故先業煩惱所感身心任運滅已更不受生無所
依故一切有漏無漏有爲諸行種子皆隨斷滅唯有
轉依無戲論相離垢真如清淨法界解脫身在名無
餘依般涅槃界常任安樂究竟寂滅不墮衆數不可
思議同諸如來但無有爲無漏功德所莊嚴故無有
更起利益安樂有情事故不同如來不定種性聲聞
獨覺住無學位雖無煩惱樂菩提故由定願力留身
相續修大修行乃至獲得金剛喻定一切障滅證佛
三身雖有有爲無漏功德而無有漏身心在故證無
餘依大涅槃界依謂三界有漏身心若諸菩薩斷二

障盡得佛果時卽得說名證無餘依大涅槃界是故
二乘先入有餘依涅槃界後入無餘依涅槃界菩薩
初證如來地時頓證二種大涅槃界一切有漏身心
盡故名無餘依猶有變化似有漏相身心在故名有
餘依悲智無斷所證得故亦名無任大涅槃界涅槃
卽是真如體上障永滅義由無漏慧簡擇諦理斷諸
雜染而證得故亦名擇滅如是擇滅於真如上假施
設有無別實物至究竟住說名涅槃無所趣故無臭
穢故離編織故離稠林故名爲涅槃聲聞獨覺有所
知障習氣未滅云何證得究竟涅槃所知障習是無

知故非染汙故障善提果不障涅槃非煩惱故不能
潤生若無願力迴心趣大至無學位盡其壽量必永
寂滅

經曰如圓鏡中大影可得所謂大地大山大樹大宮
舍影而是圓鏡不等彼量如是如來圓鏡智上從極
喜地乃至佛地智影可得及與一切世出世法智影
可得而圓鏡智非彼分量

論曰若圓鏡智能起智影應同彼量差別可得釋此
難言如圓鏡中大影可得謂大地等如世圓鏡雖能
爲緣起地等影而是圓鏡不等彼量一小鏡中衆多

山等大影可得一大鏡中衆多石等小影可得雖有
形礙而不同影大小數量鏡智亦爾雖起諸地世出
世間諸智影像無形礙故而不同彼一切智影大小
數量由是因緣諸佛鏡智名大智藏世出世間智根
本故如說世尊成大智藏鏡智能生一切智故應知
此中以智名說一切功德由是鏡智相應淨識具足
一切自利利他功德種子能爲因緣生自身中智等
影像爲增上緣生他身中智等影像由此鏡智能變
現身生智說法展轉生他智等影故或悲願力熏修
所成任運爲他智等善法增上緣故令他身中智等

善法易得生長是故經言一切衆生所有善法及殊
勝果皆是如來慈悲願力增上所起

經曰又如圓鏡非處障質影像起緣如是如來大圓
鏡智非惡友攝聞不正法障礙衆生智影起緣彼非
器故

論曰若圓鏡智爲令三乘得出離故生諸智影又悲
願力熏修所成爲增上緣生世出世諸智影者云何
世間諸外道等正智不生能生因緣常和合故諸外
道等應無顛倒釋此難言又如圓鏡非處障質影像
緣等如世圓鏡雖能爲緣現諸影像而非處在壁障

等質影像起緣如來鏡智亦復如是雖能爲緣生智
影像而非處在惡知識攝愛樂聽聞邪法障者智影
生緣以彼非是可加被器聞正法器是故外道聖道
不生常懷顛倒善法種子被損伏故惡法種子遇生
緣故一切衆生無始時來習善時少造惡時多是故
善法雖遇強緣亦難生長惡法雖遇少小外緣則便
熾盛

經曰又如圓鏡非處闇質影像起緣如是如來大圓
鏡智非樂處樂惡昧衆生智影起緣彼非器故
論曰如外緣障智影不生如是內緣宿習樂惡無明

闇障智影不起諸樂惡者雖貪瞋等一切煩惱悉皆熾盛而癡偏重以不了知善惡因果勝劣事故世間現有諸佛正法利益安樂一切衆生三寶良田生長一切世出世間無量福聚不欲聽受不樂歸依而反聽受無利無樂外道邪法歸依生長能感衆苦無量惡業種種邪神豈非無明癡闇障力是故障善無明最熏當勤修習智慧光明無明重者非善器故經曰又如圓鏡非處遠質影像起緣如是如來大圓鏡智非處不淨感匱法業不信衆生智影起緣彼非器故

論曰如是內外二緣障力智影不生一由先世感匱法業令於多時不聞正法謂於前生誹毀正法由此業障經無量劫不聞佛法卽此不聞諸佛正法是彼業果障彼智影令不得生不聞正法其體是無云何得名謗正法果云何能障可生智影不卽說彼不聞正法爲果爲障然說由彼感匱法業所得不能聽受正法不具根等愚鈍身心爲果爲障二由不信謂無種性無涅槃法不樂涅槃無有出世聖道種子於證真如有畢竟障聞出世法都不信受畢竟不得三乘涅槃如是一切身心相續不清淨故非聖法器暫時

畢竟不生出世功德智影如濁穢水不能發生月等
影像鏡智亦爾於彼不能生智影像如是略說大圓
鏡智有九種相勝所餘智謂訓詞相無分別相障清
淨相依上因緣生智影相無有我無攝受相不忘
一切所知境相徧處恒時生智影相能生一切智根
本相於非法器不能生相此有三種非聖法器一者
親近不善知識聞不正法暫時有障非聖法器二者
煩惱癡障所障非聖法器三者極重業障所障及無
出世聖道種子久時畢竟非聖法器如是三種總名
第九於非法器不能生相

經曰復次妙生平等性智者由十種相圓滿成就
論曰平等性智由十種相圓滿成就應知卽是十地
修果一一地中略說各證一平等性修習圓滿成就
佛地平等性智是故說言平等性智由十種相圓滿
成就若廣說者一一地中各證無量平等法性修習
圓滿成就佛地平等性智
經曰證得諸相增上喜愛平等法性圓滿成就
論曰諸相者謂諸大士相及諸隨好相差別故皆名
爲相如是諸相遠離徧計所執自性說名平等故契
經言諸大士相如來卽說以爲非相是故說名諸大

士相增上者謂富貴自在色等諸蘊各別皆非富貴自在和合亦非富貴自在卽別性故諸法合時不捨自性離此無實補特伽羅是故一切富貴自在遠離徧計所執自性說名平等故契經言世尊我今解了一切以無我故無貧無富喜愛者謂所有喜愛由徧計力於順彼法發生歡喜於違彼法發生憂感徧計所執諸法無故於彼一切徧計所執喜愛亦無說名平等達解如是所說諸相增上喜愛平等法性故名證得初地菩薩最初證得後後地中漸漸方便修令增長最後佛地圓滿成就從此已後更無增長由此

證得圓滿成故平等性智圓滿成就應知此中圓滿成故於第三處說第五轉一切應說由圓滿成義類相似言詞便故作如是說

經曰證得一切領受緣起平等法性圓滿成故論曰緣起有二謂內及外內緣起者謂無明等十二有支外緣起者謂種芽等一切外物內者應以雜染清淨二分行相順逆觀察外者應以此有故彼有此生故彼生行相觀察謂種等有故種等生故芽等得有芽等得生此二緣起一切皆由因有故果有因生故果生無作用義是緣起義空無我義無補特伽羅

義是緣起義如是等義緣起自相是所領受故名領受或假有情能領受故名爲領受緣起諸法是所領受如是一切領受緣起無作用故空無我故無補特伽羅故遠離偏計所執自性說名平等達解如是所說一切領受緣起平等法性故名證得由此證得如前修習圓滿成故平等性智圓滿成就如是緣起平等法性卽一切法平等法性如說梵志一切法性卽是緣生緣起法性悟解此故名爲菩提如佛所見一切法性如此卽是緣起法性又契經言不見少法離緣起性此中緣起平等法性名緣起性依此密意說

如是言若見緣起卽見法性若見法性卽見諸佛緣起實性卽勝義法勝義佛故平等法性於一切處皆無差別故作是說

經曰證得遠離異相非相平等法性圓滿成故論曰色等諸法變壞等相不相似故名爲異相遠離如是各別異相卽是共相如是共相以何爲相非相爲相如契經言一切法性惟有一相所謂非相非相卽是平等法性達解如是偏計所執一切法性畢竟永無平等法性故名證得由此證得如前修習圓滿成故平等性智圓滿成就復有說者遠離異相卽無

有相遠離非相卽無無相無有無無明平等性餘如
前說

經曰弘濟大慈平等法性圓滿成故

論曰慈有三種一有情緣二者法緣三者無緣初發
心位諸菩薩等多分修習有情緣慈多是有漏以世
俗有爲境界故修正行位諸菩薩等多分修習法緣
之慈亦多有漏大乘教法爲境界故得無生忍諸菩
薩等多分修習無緣之慈雖有所緣緣法界故譬如
眼等異熟諸法無有分別不作加行任運轉故說名
無緣平等性智相應大慈或有說者唯緣法界所緣

分別永無有故不緣有情及諸法故名無緣慈復有
說者亦緣諸法如實義者下緣有情但無分別平等
行相了知一切假立有情性平等故緣生等法性平
等故無我真如性平等故名平等智此智相應就所
緣境得具三慈但無分別平等行故說名無緣如來
地中平等性智相應大慈衆相成滿恒常現行如來
既有無緣大慈餘二不說自然成就如來由此三種
慈故平等救濟一切有情非但於彼少分與樂普於
一切有情諸法無我真如平等性轉恒常現行救度
一切故名大慈非如聲聞及異生等暫時少分與樂

論
佛地論卷五
九

論
佛地論卷五
七

行轉不能救度一切有情以勝一切聲聞等故救度一切諸有情故長時積集福慧資糧所成滿故說名弘濟如是所說弘濟大慈徧一切處無差別轉故名平等卽此平等說名法性或卽所說弘濟大慈平等法性爲所緣故就境界說名平等法性由此大慈如前修習圓滿成故平等性智圓滿成就

經曰無待大悲平等法性圓滿成故
論曰聲聞等悲不能拔濟一切有情唯緣欲界分少行相暫時而轉如來大悲普能拔濟一切有情通緣三界徧滿行相恒時而轉言無待者無所觀待恒救

不捨謂無所待隨其所應拔濟三苦所苦有情恒轉不捨猶如長者憐愛一子於諸有情平等而轉以有情界無邊際故成熟有情時無暫廢成熟有情曾不過時如來常與大悲相應不可說言暫起暫轉如經言善男子不應說言諸佛世尊所有大悲於諸有情暫起暫轉何以故恒常轉故諸佛世尊乃至大悲無根未立終不證得無上菩提如來證得大菩提已恒作是念我當安立一切有情諸善根本若未悟一切法者我當開悟如來如是於諸有情常起大悲乃至廣說如契經說如來晝夜恒於六時觀察世間云

何今言大悲恒轉此說作用六時相續恒無間斷故
不相違大慈大悲無瞋不害無癡善根以爲自性與
樂法善行相有異俱有三種有情緣等慈是無瞋悲
是不害慈緣無樂欲與其樂悲緣有苦欲拔其苦無
待大悲無差別轉故名平等此卽法性或緣平等法
性爲境由此大悲如前修習圓滿成故平等性智圓
滿成就

經曰隨諸衆生所樂示現平等法性圓滿成就故
論曰隨諸有情樂見如來色身差別如來示現如是
色身如來雖居無戲論位由平等智增上力故大圓

鏡智相應淨識現琉璃等微妙色身令諸有情善根
成熟自心變以如是身相謂自心外見如來身如契
經言由諸如來慈善根力有所示現令天人等自心
變異見如來身如金色等又如經言若所應化無量
有情宜見琉璃末尼寶色如來卽能無礙示現種種
琉璃末尼寶色令彼自心亦如是變乃至廣說如是
示現一切如來形相平等如是平等卽是法性是故
說名平等法性謂諸如來隨同所化有情樂見色身
形相卽各示現同處同時同類形相令彼自心如是
變現作利樂事如諸有情阿頼耶識共相種熟各各

論
佛地卷五
變現世界等相同處相似不相妨礙此亦如是如色身相餘事亦爾由此示現如前修習圓滿成故平等性智圓滿成就

經曰一切衆生敬受所說平等法性圓滿成故論曰若有如是種類語業能令有情善根成熟聞生歡喜得淨信樂如來便現如是語業令彼得聞如來雖無戲論分別由悲願力如是示現所化有情自勝解力如是變異謂自心外聞佛音聲如來所出一切語言稱機宜故諸人天等皆無違逆故名敬受若不稱機則不示現故說諸佛語不唐捐雖有衆生不順

佛語此是化作或當有益後必信受就總爲語故言一切敬受所說如是語言由前道理諸佛同現故名平等如是平等卽名法性由此示現如前修習圓滿成故平等性智圓滿成就

經曰世間寂靜皆同一味平等法性圓滿成故論曰有漏五蘊說名世間念念對治二種壞故卽彼息滅名爲寂靜由此於此而寂靜故卽是聖道及以涅槃依他起性世間寂靜同歸真如圓成實性故名一味又世間者徧計所執此本性無說名寂靜如是寂靜所顯真如無差別故名爲一味此卽名爲平等

法性由此一味如前修習圓滿成故平等性智圓滿成就

經曰世間諸法苦樂一味平等法性圓滿成故

論曰世間諸法略有八種一利二衰三毀四譽五稱六譏七苦八樂得可意事名利失可意事名衰不現誹撥名毀不現讚美名譽現前讚美名稱現前誹撥名譏逼惱身心名苦適悅身心名樂如是八種總有二品四違名苦四順名樂生欣感故或復此中略說毘後苦樂一對聖者居中恒常一味得利不高遇衰不下如是乃至樂而無愛苦而無恚如契經言聖處

世間平等一味猶如虛空凡愚在世計有差別由彼遠離徧計所執世間八法於一切處皆同一味卽此說名平等法性由此一味如前修習圓滿成故平等性智圓滿成就

經曰修植無量功德究竟平等法性圓滿成故

論曰功德卽是菩提分等諸功德法熏種長養成熟解脫說名修植平等性智雖無分別由佛菩薩智增上力如如意珠令異身中功德生長成熟解脫言究竟者能得三乘般涅槃故既令解脫令得世樂不說自成如是智名平等法性遠離徧計所執性故或諸

菩薩修植無量菩提分法等殊勝功德乃至究竟卽
此名爲平等法性由此功德如前修習圓滿成故平
等性智圓滿成就

經曰復次妙生妙觀察智者

論曰依十種因應知分別妙觀察智十種因者一建
立因二生起因三歡喜因四分別因五受用因六趣
差別因七界差別因八雨大法雨因九降伏怨敵因
十斷一切疑因

經曰譬如世界持衆生界如是如來妙觀察智任持
一切陀羅尼門三摩地門無礙辯說諸佛妙法

論曰此中顯示建立因相譬如世界持衆生界者如
諸有情自心所變下風輪等諸世界相能持自心所
變眼等諸有情界如是如來妙觀察智能持一切陀
羅尼門廣說乃至諸佛妙法與彼相應及能引故陀
羅尼者增上念慧能總任持無量佛法令不忘失於
一法中持一切法於一文中持一切文於一義中持
一切義攝藏無量諸功德故名無盡藏此陀羅尼略
有四種一法陀羅尼二義陀羅尼三呪陀羅尼四能
得菩薩忍陀羅尼如瑜伽論廣說其相云何唯於一
法等中普能任持一切法等謂佛菩薩增上念慧不

思議力自心相分一法相中現一切法文義亦爾又能示現無量無盡功德法門見分自體亦具無邊勝功能故任持一切令不忘失如是念慧不思議力名陀羅尼三摩地者謂增上定卽健行等諸三摩地能勝一切世出世間諸三摩地餘不能勝故名健行又佛菩薩健士所行故名健行唯第十地菩薩及佛得此定故餘三摩地隨經所說應釋其名卽陀羅尼及三摩地俱說名門如空無願無相三門以能通生無量同類異類得故無礙辯說卽四無礙法義詞辯由此四種能爲衆生辯說妙法故名辯說諸佛妙法卽

是如來力無畏等無量佛法一切之言一一應說妙觀察智轉意識得作用寬廣故能任持一切功德此智相應第六意識普與一切功德相應及能引發諸功德故說能任持

經曰又如世界是諸衆生頓起一切種種無量相識因緣如是如來妙觀察智能爲頓起一切所知無礙妙智種種無量相識因緣

論曰此中顯示生起因相妙觀察智能作頓起一切所知相識因故世界卽是諸器世間如器世間能爲衆生種種地上無量空中相識生因如是如來妙觀

察智一時頓於一切境界譬如虛空能了無礙能爲一切種種世間無量出世所緣境界相識生因此義意言一切如來妙觀察智能頓了知一切境界似所知境有衆多相如彩畫色有種種相見分智體能爲如是相識生因此能現彼說爲生因非親生因從種生故此卽緣因說名因緣由見起相或體起用雖無異體由不一故亦得爲因如從相分生見分等此亦如是

經曰又如世界種種可玩園林池等之所莊嚴甚可愛樂愛樂如是如來妙觀察智種種可玩波羅蜜多菩提分法十力無畏不共佛法之所莊嚴甚可愛樂

論曰此中顯示歡喜因相如器世間種種可玩園林池等綺飾間列威光熾盛令諸有情歡喜愛樂如是如來妙觀察智種種可玩波羅蜜多菩提分等綺飾間列威光熾盛令諸菩薩歡喜愛樂波羅蜜多略有六種謂布施等或開爲十更足方便善巧等四或復開爲八萬四千如經廣說若別分別其數無量菩提分法略三十七廣亦無量言十力者謂處非處智力等如來身中慧根所攝及具知根言無畏者謂四無畏五根所攝及具知根卽信等五不共佛法有十八

種如經廣說如是功德多分此智所攝相應及能引
發是故一切莊嚴此智

經曰又如世界洲渚日月四天王天三十三天及夜
摩天觀史多天樂變化天他化自在天梵身天等妙
飾間列如是如來妙觀察智世及出世衰盛因果聲
聞獨覺菩薩圓證無餘觀察妙飾間列

論曰此中顯示分別因相如器世間無量洲等妙飾
間列不相雜亂洲謂四大洲則瞻部洲等渚謂八小
渚則遮末囉等略舉日月攝諸星宿四天王天謂妙
高山第四層級四面各住三十三天謂此山頂四面

各有八大天王帝釋居中故有此數夜摩天者謂此
天中隨時受樂故名時分觀史多天後身菩薩於中
教化多修喜足故名喜足樂變化天樂自變化作諸
樂具以自娛樂他化自在樂令他化作諸樂具顯已
自在梵身天者離欲寂靜故名爲梵身者衆也等者
等取此上諸天如是如來妙觀察智普能觀察世及
出世衰盛因果三乘圓證妙飾間列不相雜亂惡趣
因果名世間衰善趣因果名世間盛又世間壞及世
間成如其次第名爲衰盛又損減名衰增長名盛二
乘因果名由世衰大乘因果名出世盛又退名衰進

名爲盛言圓證者卽是果位前三乘名顯其因位又
圓證者唯說佛果妙觀察智觀此諸法法相異故智
如其境行相不雜分明顯現是故說名妙飾間列

佛地經論卷第五
較譌 第五紙九行南藏 九紙十行復 十三紙十三

性法 十六紙十一行譬

音釋

瑩烏定切 置求位切 譽羊茹切 綺綺去倚切 綺麗也 飾設職

切糲也

佛地經論卷第五計字六千九百六十五

弘法會松江信士莫隴施刻併板紙銀三兩一錢
一分

松江信士徐爾鉉施寫銀三錢五分祈

先室宋氏淨根塵而入法界遊樂土以悟無生

信士徐存承閱 抱天 瑠瑠對

崇禎癸未孟夏松江弘法會貴州赤水釋繼慶較識

佛地經論卷五

七

七

佛地經論卷第六

親光等菩薩造

唐三藏法師玄奘奉詔譯

經曰又如世界爲背眾生廣大受用如是如來妙觀察智示現一切諸佛衆會雨大法雨爲令衆生受大法樂

論曰此中顯示受用因相如器世間隨有情業增上力故阿賴耶識共相種子變生種種共相資具爲令有情廣大受用如是如來妙觀察智助平等智爲增上緣擊發鏡智相應淨識現受用身種種衆會威德

熾盛雨大法雨爲令地上諸大菩薩受大法樂亦助
如來成所作智爲增上緣擊發鏡智相應淨識現變
化身種種衆會威德熾盛雨正法雨爲令地前所化
有情受用法樂

經曰如世界中五趣可得所謂地獄餓鬼畜生人趣
天趣如是如來觀察智上無邊因果五趣差別具足
顯現

論曰此中顯示趣差別因相如世界中隨有情業增
上力故阿賴耶識不共相轉變種種五趣因果差
別可得如是如來妙觀察智五趣因果爲境界故似
其五趣因果二相差別顯現非生五趣諸阿素洛種
類不定或天或鬼或復傍生故不別說五趣因者謂
中有身以與五趣爲方便故趣是所趣中有能趣故
非趣攝就生類別建立四生是故中有亦生所攝有
義中有趣方便故說在趣中此言因者業煩惱等果
卽五趣

經曰如世界中欲色無色諸界可得如是如來觀察
智上無邊因果三界差別具足顯現

論曰此中顯示界差別因相如世界中隨有情業增
上力故阿賴耶識共不共相種子變生三界因果差

別可得此中世界通情非情謂有情世界及器世界若不爾者不應於中有無色界以彼唯有定所生色無業生色無方處故於世界中隨其所應建立三界謂器世界中但有欲色情非情界有情界中具有三種唯有情界以器世界通持有情及非情界有情世界唯能任持有情界故如是如來妙觀察智三界因果爲境界故似其三界因果二相差別顯現非生三界因果同前三種分別此中意說妙觀察智普能觀察一切境故徧似一切諸界趣生煩惱業等所感諸行成熟所攝心心法等因果相現謂諸如來大圓鏡

智增上所生妙觀察智雖無所取能取執著遠離一切煩惱所知二垢障故觀察一切因果等事及能說故如淨圓鏡現衆影像一切境相皆現其中然無鏡智無差別過大圓鏡智以於一切皆不愚故雖能顯現一切影像任運轉故而無分別此智能現一切境相亦有分別若無分別則不能觀因果等事及爲衆會說法斷疑此文定證無漏心等亦有相分如來智上五趣三界無邊因果具足現故有義如來智明淨故一切境相雖現其中而此境相非智所變不清淨故但是衆生心等所變諸法影像此不應理以是影

佛地經疏卷之
論
像若是衆生心等所變云何在佛智上顯現不可他
因生他心相違正理故如餘心相此亦應爾然此境
相如來無漏心所變現如明鏡中糞穢影像雖似不
淨實非不淨心及心法緣境法爾若緣他境非如鉗
燈無動作故但如明鏡性本淨故變似境相而能緣
慮若諸境相非心上現彼雖有力生心心法如五根
等不各所緣如餘處說無分別智亦定爾耶所緣真
如不離智體不可定爾後得俗智雖不緣真有分別
故不證真體但自變作真相而離故不可難如諸異
生心緣無漏心上所有無漏境相雖似無漏實是有

漏此亦應爾唯識道理決定如是心所變相雖相似
有而實無體若不爾者應有色等如心心法不成唯
識若彼實有但不離識名唯識者心及心法亦不離
彼色等諸相應名唯境便成大過

經曰如世界中蘇迷盧等大寶山王顯現可得如是
如來觀察智上諸佛菩薩威神所引廣大甚深教法
可得

論曰此中顯示兩大法雨因相如器世間由諸衆生
業增上力起諸寶山如是如來妙觀察智由諸有情
感正法業增上力故起佛菩薩威神所引深大教法

此教開示諸佛菩薩自在威神亦能引發彼威神力是故說名諸佛菩薩威神所引此說如來妙觀察智能發鏡智相應識上教法影像或自能現教法影像由此爲緣善根成熟所化有情自心變現

經曰如世界中廣大甚深不可傾動大海可得如是如來觀察智上一切天魔外道異論所不傾動甚深法界教法可得

論曰此中顯示降伏怨敵因相如器世間由諸衆生業增上力起諸大海不可傾動如是如來妙觀察智由諸有情感正法業增上力故起法界教不可傾動

法界則是空無相理說法界理名法界教諸外道等皆依諸見法界空理對治諸見離諸見趣是故空教彼不能測不能傾動前威神教威神高廣故喻寶山此法界教法界甚深故喻大海妙觀察智是能顯照一切境因故能起說一切法教略說勝者是故契經說佛世尊名大智日普能照了一切法故

經曰又如世界大小輪山之所圍遶如是如來妙觀察智不愚一切自相共相之所圍遶

論曰此中顯示斷一切疑因相如器世界一妙高山七大金山八大海水四大洲等總於其外有小輪山

周市圍遶如是爲一積數至千復總於外有次輪山周市圍遶名小千界如是爲一復數至千更總於外有次輪山周市圍遶名中千界如是爲一復數至千總於其外有大輪山周市圍遶有大風輪總持其下名爲三千大千世界如是名爲大小輪山之所圍遶如是如來妙觀察智徧知一切自相共相能斷世間一切疑惑自共相愚是疑惑因知自共相無此愚故自無疑惑能斷他疑大圓鏡智永離二障不愚一切自相共相能生此智攝護此智故名圍遶鏡智雖能知一切法自相共相無分別故不能爲他說法斷疑

此智能知有分別故能爲一切說法斷疑又此智體能知諸法自相共相二種行相之所圍遶自相行相如小輪山共相行相如大輪山鏡智能持如風持下如來淨智現量所攝云何能知諸法共相若共相境現量所知云何二量依二相立有義二量在散心位依二相立不說定位若在定心緣一切相皆現量攝有義定心唯緣自相然由共相方便所引緣諸共相所顯理者就方便說名知共相不如是者名如自相由此道理或說真如名空無我諸法共相或說真如二空所顯非是共相如實說者彼因明論立自共相

與此少異彼說一切法上實義皆名自相以諸法上
自相共相各附已體不共他故若分別心立一種類
能詮所詮通在諸法如縷貫華名爲共相此要散心
分別假立是比量境一切定心離此分別皆名現量
雖緣諸法苦無常等亦一一法各別有故名爲自相
真如雖是共相所顯以是諸法自實性故自有相故
亦非共相不可以其與一切法不一不異卽名共相
自相亦與一切共相不一異故是故彼論說諸法上
所有實義皆名自相此經不爾故無相違
經曰復次妙生成所作智者

論曰成所作智應知成立如來化身此復三種一者
身化二者語化三者意化第一身化復有三種一現
神通化二現受生化三現業果化第二語化亦有三
種一慶慰語化二方便語化三辯揚語化第三意化
復有四種一決擇意化二造作意化三發起意化四
受領意化成所作智能起如是三業化用此化三業
卽是化身應知此中以用顯體非此三業卽是智體
但是智上所現相分成所作智增上緣力擊發鏡智
相應淨識令現如是三業化用自亦能現當知四智
一一能起一切作用就強多分說平等智起受用身

成所作智起變化身妙觀察智觀察一切自相共相
陀羅尼門三摩地等大圓鏡智能現一切諸法影像
如一一根取一切境非無強用此亦如是此中經文
定證三業心心法等皆有變化如來智上現此麤相
心心法等一切功德令諸下位能現了知若不爾者
二乘異生云何能知如來所有心心法等功德差別
云何如來久已成佛復能現作具貪瞋等種種化身
餘經亦說化無量類皆令有心又說化身亦名有心
亦名無心有依他心無自依心故謂化心等依實心
現但實心上相分似有緣慮等用如鏡中火無別自

體隨衆緣生如餘心等餘處雖說無化心等以無實
用如實心等變化色等有實作用如實色等故偏說
有由化心等籠相顯現易了知故乃至猿猴知如來
心若佛實心諸大菩薩亦不能了
經曰如諸衆生勤勵身業由是衆生趣求種種徇利
務農勤王等事如是如來成所作智勤身化業由是
如來示現種種工巧等處摧伏諸技傲慢衆生以是
善巧方便力故引諸衆生令入聖教成熟解脫
論曰此中顯示現神通化化身業相令心勇悍故名
勤勵於善性中兼取精進餘但作意由此發起勤勵

身業就因爲名由此身業世間有情作三正事等者
等取其餘雜事成所作智精進相應起化身業由此
化業爲菩薩時示現種種陶師等類工巧等處此是
智上身業相現爲欲摧伏技術傲慢故現斯事善巧
方便卽是悲慧平等運道先現神通初令生信故名
引生令入聖教如現神通度迦葉等次令調順有所
堪能故名成熟引令長養諸善根故後令解脫三界
惡趣有性無性如其次第故名解脫由教化力有種
性者令生聖道解脫三界無種性者令修世善當生
善趣令彼善根爲說正法令脫三界放光息苦安立

善趣又令彼生聞思修慧次第三句又令彼生順解
脫分順決擇分及生聖道次第三句又令彼入見道
修道及無學道次第三句如是等釋應隨相說彼亦
如是
經曰又如衆生受用身業由是衆生受用種種色等
境界如是如來成所作智受身化業由是如來往諸
衆生種種生處示同類生而居尊位由其示現同類
生故攝伏一切異類衆生以是善巧方便力故引諸
衆生令入聖教成熟解脫
論曰此中顯示現受生化身業相世間有情於諸

生處諸根領納色等境界故名受用身有運轉故名
身業成所作智一切生處同時現生受用境界謂現
化身於天人中一切生處示同類生居剎帝利婆羅
門種伏諸下類令得利樂此亦智上身業相現或擊
鏡智或自顯現餘例應爾
經曰又如衆生領受身業由是衆生領受所作善惡
業果如是如來成所作智領身化業由是如來示現
領受本事本生難修諸行以是善巧方便力故引諸
衆生令入聖教成熟解脫
論曰此中顯示現業果化化身業相身卽是業故名

身業先業果故果說因名或身領受先業果時有運
轉用故名身業由此身業領受先業愛非愛果成所
作智現似化身領受化業由此業故示受一切本事
本生難修諸行先世相應所有餘事名爲本事先世
所受生類差別名爲本生如毗濕飯怛囉等一切本
生事依此本生先所修行種種苦行名難修行或於
今世依變化身先修苦行後捨彼行修處中行方得
菩提名難修行謂諸衆生計修苦行止惡起善方得
菩提爲化彼故先示同彼修諸苦行爲顯非但持戒
得淨要由定慧方得淨故現捨苦行修處中行方得

善提有契經說如來先世迦葉佛時作是罵言何處沙門剃鬚髮者有大菩提無上菩提極難得故由彼惡業令受如是難行苦果此言亦是爲止惡行現化所作若不爾者何有繫屬一生菩薩已曾親事無量如來植諸善本性憶宿命更起如是重語惡行當知此言爲欲化度宜聞此言而得度者令於佛所離此言故

經曰又如衆生慶慰語業由是衆生展轉談論遞相慶慰如是如來成所作智慶語化業由是如來宣暢種種隨所樂法文義巧妙小智衆生初聞尚信以是

善巧方便力故引諸衆生令入聖教成熟解脫

論曰此中顯示慶慰語化化語業相慶慰卽是喜悅差別語能生彼故名慶慰聞此語言展轉發生大歡喜故謂諸有情由發語心增上力故各別識上語業相現爲增上緣令餘識變似語業相各謂聞他語言生喜成所作智化作語業應知亦爾自現妙音令他心變謂聞佛語生歡喜故隨所樂法者隨彼因力所應樂聞人天三乘諸差別法文巧妙者字句顯美令樂聞故義巧妙者理趣分明易解了故小智衆生初聞尚信者謂佛言音具六十德諸凡愚慧暫時得聞

尚生信解何況其餘聰敏者慧成所作智名慶慰者
能現化語宣說一切巧妙文義生諸有情歡喜心故
亦能加被善現等輩以佛言音宣說甚深難測量法
如是此智能加被他一切論者一切色類乃能虛空
亦能發起化語說法當知此事不可思議
經曰又如衆生方便語業由是衆生展轉指授務專
所作毀惡讚善更相召命如是如來成所作智所起
方便語變化業由是如來立正學處毀諸放逸贊不
放逸又復建立隨信行人隨法行等以是善巧方便
力故引諸衆生令入聖教成熟解脫

論曰此中顯示方便語化化語業相如諸世間方便
語業更相教示諸所應作不應作事利益親友放逸
衆生加行起作故名方便如是如來由大悲故爲諸
有情安立學處令伏諸惡修世間善安立聖道分位
差別令入正道出離三界成所作智能發化語成辦
斯事謂息諸惡發起諸善是此語用
經曰又如衆生辦揚語業由是衆生展轉開示所不
了義宣諷諸論如是如來成所作智辯語化業由是
如來斷諸衆生無量疑惑以是善巧方便力故引諸
衆生令入聖教成熟解脫

論曰此中顯示辯揚語化化語業指成所作智隨諸
衆生意樂差別現化語業說種種義斷諸疑惑謂發
一音表一切義令諸有情隨類獲益如契經言佛以
一音演說諸法衆生隨類各得開解或有怖畏或有
歡喜或生厭離或復斷疑此是如來本願所引不思
議力所發化語一音能斷一切衆疑若作化身亦令
衆生一質異見利樂事成

經曰又如衆生決擇意業由是衆生決擇可作及不
可作如是如來成所作智決擇意化業由是如來決
擇衆生八萬四千心行差別以是善巧方便力故引

諸衆生令入聖教成熟解脫

論曰此中顯示決擇意化化意業相成所作智相應
意業能起化故名化意業此能決擇所化衆生八萬
四心行差別或復此智相分中現變化意業似能
決擇衆生八萬四千心行令彼了知得勝義利云何
八萬四千心行謂諸有情八萬四千諸垢塵勞心行
差別此能障礙八萬四千波羅蜜多陀羅尼門三摩
地等如賢劫經廣說其相所謂最初修習法行波羅
蜜多乃至最後分布佛身波羅蜜多三百五十一一
皆具六到彼岸如是總有二千一百對治貪瞋癡及

等分有情心行八千四百除四大種及六無義所生
過失十轉合數八萬四千修習此故復得成就八萬
四千陀羅尼門三摩地等此猶略說廣則無量

經曰又如衆生造作意業由是衆生造作種種諸所
起業如是如來成所作智造意化業由是如來觀諸
衆生所行之行行與不行若得若失爲令取捨造作
對治以是善巧方便力故引諸衆生令入聖教成熟
解脫

論曰此中顯示造作意化化意業相隨所觀察一切
有情所行之行若諸惡行不行有得行卽有失若諸
善行行卽有得不行有失如是觀察爲欲令彼取得
捨失於得造作任持對治於失造作遠離對治成所
作智相應意業能起化故名化意業雖諸如來於一
切事無有功用而令衆生心等變現似有造作故名
造作或復此智相分中現變化意業似能觀察一切
有情諸行得失令彼了知得勝義利

經曰又如衆生發起意業由是衆生發起諸業如是
如來成所作智發意化業由是如來爲欲宣說彼對
治故顯彼所樂名句字身以是善巧方便力故引諸
衆生令入聖教成熟解脫

論曰此中 顯示發起意化化意業相成所作智相應意業能發身語二種業故就用說名發起意業或此意業由智發起是故說名發起意業能起化故或智相分現似彼故此化意業爲欲宣說彼對治者爲說有情諸行對治此所說法名句字身以爲自性是故顯示名句字身如來隨彼有情所樂說名身等令起愛樂發生對治是則如來成所作智相分中現變化意業發名身等宣說有情諸行對治由此力故令諸有情自心變似佛所說法深生愛樂發起對治是故說名發起意業

經曰又如衆生受領意業由是衆生受領苦樂如是如來成所作智受意化業由是如來於定不定反問置記爲記別故隨其所應受領去來現在等義以是善巧方便力故引諸衆生令入聖教成熟解脫論曰此中顯示受領意化化意業相相應思想能動其心令受苦樂是故說名受領意業成所作智受相應思想能起化故名化意業或相分中現化意業名化意業於四記問爲記別故隨其所應如實了知一切問已領三世等無量法義如實了知一一自體如實知已隨其所應一一記別無有顛倒言四記者一一

論
佛地論卷六
三
何記二分別記三反問記四默置記一向記者如有
問言一切生者決定滅耶佛法僧寶良福田耶如是
等問應一向記此義決定分別記者如有問言一切
滅者定更生耶佛法僧寶唯一耶如是等問應分
別記此義不定反問記者如有問言菩薩十地爲上
爲下佛法僧寶爲勝爲劣如是等問應反問記汝望
何問默置記者如有問言實有性我爲善爲惡石女
兒色爲黑爲白如是等問應默置記不應記故長戲
論故應知此中身語化業或自身相應或他身相應
或不相應意化業唯自他相應由此卽釋三種神變

謂神通教誠記說神變此佛化業於一切種恒時隨
逐不可思議作用數量國土差別不可思議故利有
情用無休息轉不思議故一切如來三種化業爲欲
成熟有情爲先說名第一方便善巧是故契經說佛
世尊名大智藥能療一切煩惱病故

經曰爾時妙生菩薩摩訶薩白佛言世尊爲獨如來
於淨法界受用和合一味事智而諸菩薩亦能如是
佛告妙生菩薩亦能受用和合一味事智

論曰今依受用和合一味事智爲問前辯佛地但說
如來清淨法界體唯一味佛鏡智等於中受用和合

一、味無動無作妙生菩薩意疑此事爲唯如來亦通菩薩故作此問或前但說有五種法攝大覺地清淨法界體唯一味鏡智依此緣此而生無分別故亦唯一相平等性智通緣真如離二分亦唯一相其餘二智爲饒益他亦依真如無異分別亦唯一相如是唯佛受用和合一味事智應不通餘爲欲審定故作此問此中旣言於淨法界受用和合一味事智證智於餘無有受用和合一味事智能受用所應受用和合一味真如境界故名受用共同一事故名爲和雖同一事或復離別爲顯於中常不離別故復言合所

緣能緣平等平等畢竟和合不離別故味者堅實卽所受用所緣法界真如一味事謂事用智者卽是能受用智正取鏡智平等性智兼取餘二多緣真故或一味者能受用智無分別故事者是果緣淨法界而生起故或能受用卽是捨受無苦無樂平等一類故名一味事者果也卽此相應圓鏡智等由彼力生故名彼果或是行捨無功用相於一切處一味而轉能受用智說名事智或智自能領受已體故名受用自他二種分別無故說名一味事者果也從衆因緣遠離二想恒時轉故菩薩亦能等者此中意說受用和

合一味事智非獨如來若諸菩薩亦能如是云何但言有五種法攝大覺地此中意說佛地唯是五法所攝不說五法唯攝佛地亦能攝諸菩薩地故

經曰妙生菩薩復白佛言何等菩薩受用和合一味事智佛告妙生證得無生法忍菩薩由彼菩薩無生法中得忍解時對治二想由遣自他二種想故得平等心從此已上彼諸菩薩自他異想不復現前受用和合一味事智

論曰爲顯未得大乘無生法忍菩薩或住功用有加行道菩薩未有受用和合一味事智故復問言何等菩薩受用和合一味事智證得無生法忍菩薩謂從初地已上菩薩證得二空所顯真如觀一切法徧計所執本性無生亦無有滅本來寂靜自性涅槃受用和合一味事智非如二乘見道現觀但證生空所顯真如未證法空所顯真理未能現觀諸法平等受用和合一味事智地前菩薩亦未能證未見真如和合一味平等性智未現行故有說初地已上菩薩復有三種一初發心謂在初地已入見道正性離生真無漏心創現行故二已修行謂上六地已得修道進修行故三不退轉謂上三地修道已滿離諸功用無加

行道任運現前一切煩惱畢竟不起念念勝進無退
轉故此中唯取八地已上觀一切法本來無生今亦
不起得上品忍一向清淨恒起無漏任運而轉由得
此故說名證得無生法忍如契經言八地已上諸菩
薩衆離法想故無我我所觀一切法非常無常無生
無起自他平等乃至廣說由得任運二想對治於一
切處得平等心從此已上離二想故離諸功用及加
行故一向無漏極清淨故無分別智已得自在任運
轉故方得說名受用和合一味事智初地菩薩雖已
證得自他平等而有功用加行作意未清淨故而未

建立

經曰妙生菩薩復白佛言惟願如來廣說譬喻令諸
菩薩悟甚深義隨所化緣廣宣流布令諸衆生聞已
疾悟無生法忍

論曰妙生菩薩爲令上義因譬喻門明了易見諸菩
薩等聞是法已悟甚深義悟無生忍故復請問

經曰佛告妙生譬如三十三天未入雜林終不能於
若事若受無我我所和合受用若入雜林卽無分別
隨意受用由此雜林有如是德能令諸天入此林者
天諸果報若事若受無所思惟和合受用如是菩薩

若未證得無生法忍終不能得平等之心平等之捨
乃與一切聲聞獨覺無有差別有二想故彼不能任
受用和合一味事智若已證得無生法忍遣二想故
得平等心遂與聲聞獨覺差別由平等心而能任捨
受用和合一味事智

論曰三十三天有一雜林諸天和合福力所感令諸
天衆不在此林宮殿等事苦樂等受勝劣有異有我
我所差別受用若在此林若事若受都無勝劣皆同
上妙無我我所和合受用能令平等和合受用故名
雜林此由諸天各修平等和合福業增上力故令彼

諸天阿賴耶識變現此林同處同時同一相狀由此
雜林增上力故令彼轉識亦同變現雖各受用而謂
無別如是地前菩薩二乘未證二空所顯真如無生
法忍有見道斷差別執故未離自他差別二想未得
無漏平等性智相應之心平等受捨或復行捨故不
能任受用和合一味事智有義七地已下菩薩猶有
功用有加行道猶有微細煩惱現行未清淨故未得
任運無生法忍妙觀察智相應平等若心若捨故不
能任受用和合一味事智

經曰復次妙生譬如種種大小衆流未入大海各別

所依異水少水有增減隨其水業所作各異少分
依持水族生命若入大海無別所依水無差別水無
限量水無增減所作業一廣大依持水族生命如是
菩薩若未證入如來清淨法界大海各別所依異智
少智智有增減隨其智業所作各異少分衆生成熟
善根之所依止若已證入如來清淨法界大海無別
所依智無差別智無限量智無增減受用和合一味
事智無量衆生成熟善根之所依止

論曰大衆流者謂宛伽等四種大河小衆流者謂餘
小河未入大海各別所依者種種地方爲所依故異

水者清濁灰美水差別故少水者望大海故水有增
減者少雨多雨時差別故隨其水業所作各異者種
種氣味勢力成熟有差別故少分依持水族生命者
少數少量水族有情所依持故若入大海無別所依
等者與前所說一切相違應知其相廣大依持者此
依數廣量大而說如是菩薩未證如來法界大海者
未證諸佛清淨法界各別所依者別別如來爲所依
故異智者各別勝解所修成故少智者望佛智故智
有增減者諸地相望有勝劣故及定相望有勝劣故
隨其智業所作各異者諸菩薩定數量別故所作各

佛地經論卷六
三
異隨諸菩薩勝解勢力緣有情界能有所作過此不
轉是故各異劣分衆生等者少數少量成熟善根所
依止故由諸菩薩增上力故隨分令他善根成熟諸
菩薩定望如來定數量少故化諸有情利樂亦少若
證如來法界大海者已證諸佛清淨法界無別所依
者清淨真如爲所依故無漏界中不可建立諸佛有
異何況菩薩智無差別者圓鏡智等皆相似故無有
自他分別異故智無限量着了達無邊所知境故智
無增減者等清淨故徧知境界無少多故受用和合
一味事智者平等智等一切所作皆相似故無量衆

生等者若數若量皆無量故福德智慧無盡資糧皆
平等故由得法身窮生死際一切有情成熟善根所
依止故前後二喻有差別者有義前喻說諸菩薩未
入已入或歡喜地或不動地後大海喻說諸菩薩未
入已入或不動地或如來地有義二喻同說菩薩未
得已得無生法忍前說菩薩功德稠密喻如雜林後
說菩薩功德無盡喻如大海

佛地經論卷第六

較論

第十一紙

十四行乃能
南作乃至

十二紙

七行辦
南作辯十三

紙十行三十六紙

四行但
南作俱

佛地經論卷第六計字八千三百

弘法會松江信士孫彬 施刻併板紙銀三兩七

錢二分

松江信士徐爾鉉施寫銀四錢二分所

先室宋氏淨根塵而入法界遊樂土以悟無生

信士徐洊承閱 抱香庵祖璿對

崇禎癸未孟夏松江弘法會貴州赤水釋繼慶較識

佛地經論卷第七

親光 等 菩薩 造

唐三藏法師玄奘奉詔譯

經曰爾時世尊而說頌曰

論曰當說四頌總攝上義略顯佛地淨法界相如來
地中一切有爲無爲功德皆是清淨法界攝持皆是
清淨法界之相所相能相俱名相故於四頌中前三
頌半別顯其相後半總結別顯相中有義此中前半
顯示清淨法界次半顯示大圓鏡智次半顯示平等
性智次半顯示妙觀察智次半顯示成所作智次半

顯示四智所攝眷屬功德後半顯示五法所成三身
差別復有義者此中顯示清淨法界有六種相總攝
一切佛地功德謂自性相因相果相若作業相若相
應相若差別相如其次第初有一頌餘各半頌
經曰

一切法真如 二障清淨相

論曰有義此顯清淨法界謂一切法空無我性所顯
真如永離二障本性清淨今復離染能爲一切善法
所依是故說名清淨法界一切法者謂世出世有漏
無漏蘊界處等真如卽是諸法實性無顛倒性與一

切法不一不異體唯一味隨相分多或說二種謂生
空無我法空無我真如實非空無我性離分別故絕
戲論故但由修習空無我觀滅障真如我我所執而
證得故名空無我或說三種謂善不善無記真如是
此三法真實性故或說四種謂三界繫不繫真如是
此四法真實性故或說五種謂心真如廣說乃至無
爲真如亦是五法真實性故或說六種謂色真如廣
說乃至無爲真如五蘊無爲真實性故或說七種一
流轉真如謂一切行無始世來流轉實性二實相真
如謂一切法二空無我所顯實性三唯識真如謂一

論
佛法經論卷一
二
節九
切法唯識實性四安立真如謂有漏法苦諦實性五
邪行真如謂業煩惱集諦實性六清淨真如謂善無
爲滅諦實性七正行真如謂諸有爲無漏善法道諦
實性或說八種謂不生不滅不斷不常不一不異不
來不去八遣相門所顯真如或說九種謂九品道除
九品障所顯真如或說十種謂於十地除十無明所
顯真如卽十法界如攝大乘廣辯名相如是增數乃
至窮盡一切法門皆是真如差別之相而真如體非
一非多分別言說皆不能辯由離一切虛妄顛倒假
名真如能爲一切善法所依假名法界離損減謗假

名實有離增益謗假名空無分析推求諸法虛假極
至於此更不可度唯此是真假名實際是無分別最
勝聖智所證境界假名勝義如是廣說言二障者一
煩惱障二所知障煩惱身心令不寂靜名煩惱障覆
所知境無顛倒性令不顯現名所知障煩惱障者謂
執實我薩迦耶見以爲上首百二十八根本煩惱及
隨煩惱若所發業若所得果皆攝在中皆以煩惱爲
根本故所知障者謂執遍計所執諸法薩迦耶見以
爲上首所有無明法愛恚等諸心法及所發業并
所得果皆攝在中皆以法執及無明等爲根本故有

義法執及無明等遍在一切善惡無記有漏心品及
與二乘無漏心品皆不了達法無我故皆似相分見
分起故有義唯在不善無記有漏心品瑜伽師地說
諸無明但有二種一者不善二者無記復有二種一
者染汙二不染汙不言有善不可非善善心相應性
相違故又善心品必與無癡善根相應癡卽無明不
可一心癡無癡並如貪無貪瞋無瞋等不相應故不
可法執不與癡俱若無無明無倒執故如執有我定
無明俱此亦應爾又諸善心性無迷執皆信等俱順
無我解與二空觀爲前方便不可法執導法空觀我

執未曾見此事故是故有漏無漏善心決定不與二
執無明愛等相應違教理故一切異熟無記心品亦
無法執及無明等分別力劣不能執故若有倒執成
法我見有無明等阿賴耶識不應唯與五法相應見
無明等慧等攝故又若此識有法執者無所熏故應
念念失不須對治則成大過煩惱障中無此事故又
法空觀初現前時此識應斷障治相違不俱行故若
爾所餘有漏種子應無所依所修功德應無熏習無
所熏故不可說言熏習鏡智相應淨識非無記故猶
未得故阿賴耶識旣無法執餘轉識中異熟果者亦

論
應如是性類同故於五識中亦無法執無有猛利分別用故不推求故攝大乘說能遍計心唯是意識故知五識不緣遍計所執自性如無分別無推求見不能計我故亦不能計度諸法然由意識計我計法起愛恚等引五識中非見所攝愛恚等起雖無有見而有愛恚無明等法二障所攝是故二執分別推求唯在第六第七意識若愛恚等非見所攝不推求者亦在五識諸我執等煩惱障體唯在不善有覆無記二心中有若法執等所知障體亦在無覆無記心中二乘無學亦現行故無學位中無有不善有覆無記此

就二乘名爲無覆若望菩薩是染汙故亦名有覆故所知障亦名無覆亦名有覆一體二名所望別故煩惱障中有所知障是所依故必執有法而計我故體雖無二而用有別如一識體取境用多由此熏生一種子體亦有多用起時雖俱而漸次斷聖道勢力有分齊故若所知障就二乘說無覆無記四無記中何無記攝異熟生攝以從異熟識生起故若爾何者非異熟生如增上緣餘所不攝皆此攝故威儀等心不堅執故非普遍故無二障體若善無覆無記心中無法執者云何不能了達法空亦無我執云何不能了

達生空此既由與第七識中我執俱故不達生空亦應由與第七識中法執俱故不達法空既似相分見分而起云何不名法執所攝諸佛菩薩無漏智等亦有二分云何非執是故緣生相分見分依他起攝若於此上妄計心外或定性有方名爲執故所知障在第七者遍與六識三心性俱非相應品且止廣諍應釋本文清淨相者謂此真如本性清淨二障所覆如淨虛空煙雲等障相似不淨得出世間證真如道漸除二障所有種子猶如大風吹煙雲等金剛喻定現在前時滅離一切障種子盡得淨法界究竟轉依名

清淨相如是已顯前五法中清淨法界有義此顯自性一分法界淨相卽六相中自性一分文同前釋經曰

法智彼所緣 自在無盡相

論曰有義此顯大圓鏡智法者卽是依他起性緣法鏡智名爲法智大圓鏡智亦緣世俗依他起性現彼影故不迷彼故彼所緣者彼謂真如非彼法智雖復隔句義勢相應故無有過法智用彼爲所緣故名彼所緣非謂法智是彼所緣大圓鏡智亦緣勝義圓成實性窮生死際內證彼故此說鏡智緣一切法自相

共相依他起性圓成實性俱爲境故遍計所執但是
凡愚妄心所計非聖智境故不說緣如論中說遍計
所執唯凡智境圓成實性唯聖智境依他起性亦凡
智境亦聖智境遍計所執以無體故非聖所證若爾
聖智不知一切彼既是無智何所知若知爲有則成
顛倒若知爲無則非遍計所執自性心所現無依他
起攝真如理無圓成實攝是故聖智雖知有無而不
緣彼遍計所執自性爲境言自在者大圓鏡智六到
彼岸所修成故具十自在妙用無礙無盡相者窮生
死際無間無斷相續常故相謂所相或復能相表自

體故如是總顯前五法中大圓鏡智有義此顯自性
一分佛果四智卽六相中自性一分有爲功德法者
卽是大圓鏡智由對治力轉去一切麁重所依阿賴
耶識轉得清淨依他起性遠離一切心慮分別所緣
能緣平等平等不可宣說緣生法性不增不減內證
行相能現一切諸法影像於一切境普能照了無分
別故總說名法智者卽是平等性智由對治力轉去
執著衆生及法第七末那轉得清淨依他起性緣鏡
智等及淨法界平等平等內證行相故名爲智彼所
緣者卽餘二智由對治力轉去世間分別六識轉得

清淨依他起性或出世間或世出世彼後所得緣上
真如及法智等依他起性以爲境界無執分別似所
緣現分別自內所證能證用彼上說真如法智爲所
緣故名彼所緣如是四智妙用無礙故名自在窮生
死際常用不息故名無盡大圓鏡智平等性智常無
間斷故名無盡妙觀察智成所作智雖有間斷而暫
作意卽能現前數起無窮亦名無盡相謂體相皆從
緣生說名清淨依他起性皆無顛倒說名清淨圓成
實性皆有內證照境作用似境顯現說名爲智如是
等義能表自體故名爲相

經曰

普遍真如智 修習證圓滿

論曰有義此顯平等性智謂初地中初現觀時得此
平等無分別智觀真如等一切平等於後諸地漸次
修習轉勝轉淨乃至佛地證得圓滿究竟清淨證法
界等一切理事皆悉平等如是顯示前五法中平等
性智有義此顯六中因相謂初地中無分別智觀初
法界見道三心斷見道斷百一十二根本煩惱及隨
煩惱并滅見斷不染無明分別法執毘篋一分顯初
法界智種增長從此以後於一切地修道位中無分

別智觀餘法界如如於彼一切法門聞思修等加行
智等方便等位漸次修習如是如是隨其所應漸伏
修斷十六煩惱及隨煩惱并隨所應漸滅修斷不染
無明俱生法執所餘諸分顯餘法界智種增長由此
爲因乃至佛地證得法界四智圓滿

經曰

安立衆生二 諸種無盡果

論曰有義此顯妙觀察智謂此妙智能爲衆生說妙
法等安立衆生利益安樂故名爲二卽此二種有多
品類故名諸種如是二事窮生死際常作不絕故言

無盡此卽名果是智果故如是顯示前五法中妙觀
察智有義此顯六中果相謂淨法界及四妙智皆能
安立一切衆生利益安樂令修善因名爲利益令得
樂果名爲安樂又令離惡名爲利益令其攝善名爲
安樂又拔其苦名爲利益施與其樂名爲安樂此世
他世出世等應知亦爾品類衆多故名諸種窮未
來際故名無盡如是二事諸種無盡是淨法界及四
智果由此起故

經曰

身語及心化 善巧方便業

論

佛地論卷三

九

九



論曰有義此顯成所作智謂智能起身語心化稱順
機宜故名善巧加行不絕故名方便此卽名業或復
此智善巧方便能起身語心三化業如是顯示前五
法中所作智有義此顯六中業相謂淨法界及四
妙智能起身語心三化業及與善巧并方便業成所
作智起身語心三種化業妙觀察智起善巧業觀機
宜等極巧便故其餘二智及淨法界起方便業以能
任運與一切業爲方便故身化三種一自身相應謂
化自身爲輪王等種種形類及現種種諸本生事二
他身相應謂化魔王爲佛身等變舍利子爲天女等

寄他身上亦現種種變化形類三非身相應謂現大
地爲七寶等或現無量佛化身等或放光明照無邊
界如是等類離自他身別現化作情非情色種種形
類動地放光風香等事皆爲利樂諸有情故一切皆
名佛化身業如是語化亦有三種一自身相應謂佛
自身化現梵音通告無邊諸世界等種種語業二他
身相應謂令聲聞大弟子等以佛梵音宣說大乘甚
深法等是故聲聞諸菩薩等說非已分甚深妙法皆
是如來變化所作非彼自力三非身相應謂化山海
草木等類乃至虛空亦出音聲說大法等如是皆名

變化語業心化唯二一自身相應謂自心上化現種種心及心法影像差別二他身相應謂令他心亦現種種心及心法影像差別此並相分似見分現有義定力能令自心解非分法名化自心加被有情令愚昧者解深細法令失念者得正憶念名化他心然心無化無形質故如論說言心無形故不可變化又說化身無心心法此就二乘及諸異生定力而說彼定力劣不能化現無形質法諸佛菩薩不思議定皆能化現若不爾者云何如來現貪瞋等云何聲聞及傍生等知如來心云何經說化無量類皆令有心云何

上說諸化意業云何經說有依他心但諸化色同實色同化根及心但有相現不同實用又就下類故作是說若爾云何不化非情令心相現非情已是心等相分云何復令有心相現若心相現則名有情非非情攝是故化心但說二種如前已說妙觀察智能觀自證陀羅尼門三摩地等能觀有情根欲性等說妙法藥名善巧業其餘二智及淨法界與諸功德爲所依止能起種種利有情事名方便業

經曰

定及總持門 無邊二成就

論曰有義此顯四智所攝眷屬功德有義此顯六種相中相應之相定門卽是八萬四千三摩地門總持門者八萬四千陀羅尼門如是二種通生一切有爲功德通顯一切無爲功德通引一切神力作用利衆生事故名爲門無邊二者福德智慧二種莊嚴於中差別有無量種八萬四千福德智慧或無量劫修所成故說名無邊前五波羅蜜多名爲福德後一波羅蜜多名爲智慧或隨所應自性眷屬一一具二如是二門二種莊嚴四智品中一一具足恒共相應亦復依止清淨法界與淨法界不相捨離故名成就

經曰

自性法受用 變化差別轉

論曰有義此顯五法所成三身差別有義此顯六種相中差別之相雖諸如來所依清淨法界體性無有差別而有三身種種相異轉變不同故名差別自性法者卽是如來初自性身體常不變故名自性力無畏等諸功德法所依止故亦名法身受用卽是次受用身能令自他受用種種大法樂故變化卽是後變化身爲欲利益安樂衆生示現種種變化事故體義依義衆德聚義總名爲身如是略釋三身名義

又法身者究竟轉依真如爲相一切佛法平等所依能起一切自在作用一切白法增上所顯一切如來平等自性微妙難測滅諸分別絕諸戲論故契經言諸佛法身不應尋思非尋思境超過一切尋思戲論受用身者一切功德圓滿爲相一切佛法共所集成能起一切自在作用一切白法增上所起一切如來各別自體微妙難測居純淨土任運湛然盡未來際自受法樂現種種形說種種法令大菩薩亦受法樂變化身者一切神變圓滿爲相一切化用共所集成示現一切自在作用一切白法增上所引一切如來

各別化用微妙難測居淨穢土現種種形說種種法成熟下位菩薩二乘及異生衆令入大地出離三界脫諸惡趣如是略釋三身相用

又前五法攝三身者有義前二攝自性身中間二種攝受用身成所作智攝變化身經說真如是法身故論說轉去阿賴耶識得自性身大圓鏡智轉第八得故知前二攝自性身此經中說成所作智起諸化業莊嚴論說成所作智於一切界發起種種無量難思議變化事故知後一攝變化身平等性智如餘論說能於淨土隨諸菩薩所樂示現種種佛身妙觀察智

亦如論說於大集會能現一切自在作用說法斷疑
又說轉去諸轉識故得受用身故知中二攝受用身
又佛三身皆十義中智殊勝攝故知三身皆得有智
有義初一攝自性身四智自性相應共有及爲地上
菩薩所現一分細相攝受用身若爲地前諸菩薩等
所現一分麁相化用攝變化身諸經皆說清淨真如
爲法身故讚佛論說如來法身無生滅故莊嚴論說
佛自性身本性常故能斷金剛般若論說受持演說
彼經功德於佛法身為證得因於餘二身為生因故
諸經論說究竟轉依以爲法身轉依卽是清淨真如

非對治道故知法身唯淨法界真如爲性莊嚴論說
大圓鏡智是受用佛攝大乘說轉諸轉識得受用身
然說轉去阿賴耶識得法身者此說轉去第八識中
二障種子顯得清淨轉依法身非說鏡智以說鏡智
是受用故又受用身略有二種一自受用三無數劫
修所成故二他受用爲諸菩薩受法樂故是故四智
相應共有及一分化爲受用身經論皆說化身爲他
地前衆生現種種相旣是地前衆生境界故知非是
真實功德但是化用經論唯說成所作智能起化業
非卽化身雖三種身智殊勝攝法身是智所依證故

化身是智所起用故似智現故假說爲智亦無有過如是三身受用變化既有生滅云何經說諸佛身常由二所依法身常故又受用身及變化身雖有生滅以恒受用種種法樂無休廢故於十方界數數現化無斷絕故如常受樂如常施食故說名常莊嚴論說常有三種一本性常謂自性身此身本來性常住故二不斷常謂受用身恒受法樂無間斷故三相續常謂變化身沒已復現化無盡故如是法身雖離一切分別戲論而無生滅故說名常二身雖有念念生滅而依常身無間斷故恒相續故說名爲常經說如來

色受等法一切常住依此道理非無生滅無漏種子修習增長所生起故生者皆滅一向說故色心皆見是無常故常住色心曾不見故如是三身云何形量法身清淨真如爲體真如卽是諸法實性法無邊際法身亦爾遍一切法無處不有猶如虛空不可說其形量大小就相而言遍一切處受用身者有色非色非色諸法無形質故亦不可說形量大小若就依身及所知境亦得說言遍一切處色有二種一者實色二者化色言實色者三無數劫修感色身相好等業轉五根等有漏色身得佛無漏

五根等色無量相好莊嚴其身周遍法界稱實淨土
於生死中業有分限阿賴耶識所變身形大小不定
且如此界瞻部洲人善業最劣所得色身極長四肘
東勝身洲善業次勝身長八肘如是善業漸漸增勝
所得色身形量漸大乃至色界色究竟天感色業中
最殊勝故所得色身一萬六千踰繕那量十地菩薩
無漏善根所資薰故身形轉大如經廣說金剛喻定
現在前時滅一切障善根勢力量無邊故所得色身
充滿法界遍實淨土大圓鏡智相應淨識所變身土
無限量故諸佛識變同處同時其相相似不相障礙

盡未來際無間無斷依此能令諸佛受用廣大喜樂
是故說名受用身土如是身土唯佛乃知非諸菩薩
五根所證一一色根能證一切所證境界無障礙故
是故諸佛無見頂相無邊法音一切色根作用無限
以遍滿故言化色者由悲願力爲入大地諸菩薩衆
現種種身種種相好種種言音依種種土形量不定
變化身者亦悲願力爲化地前諸有情故現變化身
通色非色非色卽是變化意業力無畏等諸功德相
無形質故無有形量色者變化身語業等隨時隨處
隨衆所宜所現身形其量不定如經廣說

如是三身一切如來爲有差別爲無差別法身實性
一切如來皆共有故無有差別就能證因有差別故
假說差別其餘二身各別因感各別自性實有差別
但無別執同處相似利樂意樂事業平等說無差別
是故說言一切諸佛由所依上意樂事業於三種身
如其次第說無差別所依法界無差別故利樂意樂
無差別故共作事業無差別故
如是三身爲有各別諸功德不如來法身清淨真如
轉依爲相真實善有本性清淨遠離一切雜染法故
一切功德所依止故一切功德真實性故說名具足

一切功德無有色心差別功德佛受用身具足一切
色心等法真實功德及爲他現化相功德佛變化身
唯具一切現色心等化相功德是故三身皆說具有
過宛伽沙數量功德

一切如來所化有情爲共不共有義皆共以一一佛
皆能化度一切有情福德智慧一切平等三無數劫
勤修行願同爲拔濟一切有情求菩提故如說一佛
所化有情卽一切佛有義不共以佛所化諸有情類
本相屬故是故如來底沙佛時曾與慈氏同爲弟子
佛觀釋迦所化有情善根先熟慈氏所化善根後熟

又觀慈氏因行先滿釋迦後滿遂於一處入火光定
令釋迦見七日七夜不下一足一頌贊歎令超慈氏
在前成佛又佛將欲入涅槃時作如是言我所應度
皆已度訖又契經說佛涅槃時觀一所化現在非想
非非想處當生此間應受佛化留一化身潛住此界
先所受身現入涅槃彼從非想非非想沒來生此間
佛所留化爲說妙法成阿羅漢爾時化身方沒不現
又諸經中處處宣說能化所化相屬決定是故諸佛
所化不共如實義者有共不共無始時來種性法爾
更相繫屬或多屬一或一屬多菩薩因時成熟有情

亦不決定或共不共故成佛已或共化度或別化度
若所化生一向共者何須多佛一佛能化一切生故
唯應一佛常住世間教化衆生餘佛皆應入永寂滅
佛亦不應化餘衆生令趣大乘以無用故但應化彼
令得三乘入永寂滅以易得故誰有智者捨易就難
然燈助日是故所化非一向共若所化生一向不共
菩薩不應發弘誓願歷事諸佛修學大乘蘇達那等
亦不應事多善知識諸佛不應以已所化付囑後佛
如是等事皆悉相違是故不應一向不共雖一一佛
有化一切有情功能然諸有情於無緣佛不肯受化

亦不見聞雖一一佛盡未來際常住世間教化無量
諸有情類而隨所宜現種種化或現等覺或現涅槃
或名釋迦或慈氏等隨一化相所度有情言皆度訖
生非想者宜見釋迦化相得度故留化待亦不相違
若諸如來同一所化何佛現前而化彼耶諸佛皆有
悲願力故不可一化餘皆止息但有緣佛同處同時
後得智上各現一化其狀相似不相障礙更相和雜
爲增上緣令所化生識如是變謂見一佛爲現神通
爲說正法如是等事不可思議非唯識理不可解了
又自性身寂滅安樂正屬自利功德所攝爲增上緣

益衆生故兼屬利他又與二身俱利功德爲所依故
二利所攝受用身者具有二分一自受法樂分謂三
無數劫修自利行滿足所證色等實身令自受用微
妙喜樂二他受法樂分謂三無數劫修利他行滿足
所證色等化身爲入大地諸菩薩衆現種種形說種
種法令諸菩薩受大法樂由此二分或說此身唯自
利攝或說此身唯利他攝或說俱攝皆不相違變化
身者唯爲利他現諸化相故利他攝
如是三身有四分故得爲四句一受用非變化謂自
利分實受用身二變化非受用謂變化身爲化地前

雜類生故或竈或妙或令歡喜或令怖畏改轉不定
但名變化不名受用不必令受現法樂故三亦受用
亦變化謂爲地上菩薩所現種種化身令諸菩薩受
法樂故隨時改轉不決定故

或處說佛有二種身一者生身二者法身若自性身
若實用身俱名生身諸功德法所依止故諸功德法
所集成故若變化身若他受用俱名生身隨衆所宜
數現生故

又餘經說有十種佛一現等覺佛二弘誓願佛三業
異熟佛四住持佛五變化佛六法界佛七心佛八定
佛九本性佛十隨樂佛前五世俗後五勝義隨真所
應三身所攝如是等類隨相應知

經曰

如是淨法界 諸佛之所說

論曰如是如來清淨法界諸佛同說具足佛地五種
功德三身差別或自性等六句義相由此四頌略說
佛地一切功德及前廣說應知總名聖教所說

經曰時薄伽梵說是經已妙生菩薩摩訶薩等諸大
聲聞世間天人阿素洛等一切大衆聞佛所說皆大
歡喜信受奉行

論曰此中顯示聞法衆會依教奉行由佛淨識悲願
 所引變以契經增上緣力時衆自心善根成熟似彼
 相現謂聞佛說皆生歡喜信受奉行諸聲聞等或現
 化作或是眞實受用變化二土同處聽法徒衆所聞
 雖同所見各異不相障礙上亦見下下不見上各各
 利益安樂事成

佛地甚深諸句義 我今隨分已略釋

功德普施諸羣生 願速等成無上果

諸有書寫所生福 後後勝善等流果

願此相續盡未來 利益安樂諸含識

佛地經論卷第七

較譌

第十五紙

十六行踰

十六紙

三行下所

佛地經論卷第七計字七千七百四十

弘法會松江信士孫彬 施刻併板紙銀三兩四

錢八分

松江信士徐爾鉉施寫銀三錢九分二厘祈

先室宋氏淨根塵而入法界遊樂土以悟無生

信士徐洵承閱 抱香庵祖璿對

崇禎癸未孟夏松江弘法會貴州赤水釋繼慶較識

好嚴身過百千日光明世尊而說是經偈言

無量種具足 出身三界主 第一勝相集

超日光牟尼 何所饒益故 說此修多羅

世尊何故遊毗舍離大林精舍以何義故名爲世尊
何故世尊遊毗舍離大林精舍不於餘處爲善男子
說此菩薩三種具足以何因緣而說如是三種具足
不多不少又復云何菩薩爲當惟有如是三種具足
爲當更有餘法具足若此說三大海慧經云何相避
彼說菩薩四十具足所謂菩薩布施具足乃至菩薩
方便具足彌勒解說修多羅中言善男子菩薩滿足

無量具足更有大乘修多羅中彼處世尊爲菩薩說
無量具足彼云何避又復聖者龍樹已說偈言

淨道皆具足 餘人不能說 佛無量智慧

故能說具足 佛無邊功德 具足是善根

若如是菩提 有無量具足

若餘處說菩薩則有無量具足此修多羅云何相避
善男子者是種性義何故菩薩名爲種性此義須說
以何義故名爲具足施具足者何故名施有幾種施
戒具足者何故名戒有幾種戒聞具足者何故名聞
有幾種聞又復施戒二具足漏聞具足者則是不漏

以何因緣以漏不漏二種具足得一切智不漏之法
此義須說又施具足幾種因緣戒聞具足幾種因緣
又復世尊說三具足何故初施中戒後聞此意須說
以要言之世尊示現云何施具足云何戒具足云何
聞具足此皆作難我今解釋何故世尊施戒聞等無
量無垢不可稱量布施具足身如虛空住無垢法而
說是經彼義今說偈言

第一施戒聞 寂正行苦身 如空勝法持
具足善光明 人天禮牟尼 第一世間覺
無垢除三苦 何義說此經

此義今說發菩提心學菩薩業相應饒益一切智人
示現此義菩薩既發菩提心已次滿施等三種具足
此菩薩業非唯發心而能證得阿耨多羅三藐三菩
提偈言

若發菩提心 悲衆生苦惱 彼相應善業
佛說此勝經

又復何義佛說此經爲怯弱者除怯弱故爲彼始行
菩薩行者聞修無量種種法故爾乃獲得阿耨多羅
三藐三菩提生怯弱心佛知彼意爲除怯弱饒益彼
故而說是經言善男子菩薩唯有三種具足世尊示

言汝勿怯弱若我廣說過不可數菩薩具足以要言之三具足攝偈言

若有諸佛子 畏經無量劫 怯弱於善法

久遠得菩提 如來自然智 安慰饒益彼

是故第一覺 說此修多羅

又復何義佛說此經菩薩欲得趣一切智第一勝舍須資糧乘及道方便示現此義大導師言若汝欲得趣一切智第一勝舍須道資糧取施具足若須所乘取戒具足知道方便取聞具足示現此義偈言
佛子若欲趣 一切智勝舍 彼人樂相應

道資糧等覺 世尊饒益彼 說此修多羅

又復何義佛說此經菩薩希望境界生智三種具足不解其因覺因饒益世尊已示若汝欲得境界生智非唯希望汝應修滿三種具足若施具足當得境界若戒具足汝當得生若聞具足汝當得智偈言

菩薩若希望 善微妙境界 欲勝生不劣

第一增上智 示現因饒益 世尊說是經

又復何義佛說此經菩薩欲得過五怖畏不解其因覺因饒益何等爲五一者不活畏二者惡名聞畏三者死畏四者惡道畏五者大衆威德畏世尊已示若

汝欲得過五怖畏應當修滿三種具足若施具足離
不活畏惡名聞畏若戒具足則離死畏離惡道畏若
聞具足則離大衆威德怖畏偈言

第一善逝子 欲離種種畏 智慧人覺示

第一廣勝因 是故牟尼尊 說此修多羅

又復何義佛說此經爲彼疑者斷疑義故彼大衆中
有人有天有阿修羅有龍夜叉鳩槃荼等見聞世尊
勝身口意不可思議生如是心不知世尊幾種具足
獲得此三不可思議是故世尊爲斷此疑已說是經
言善男子菩薩修行三種具足此已示現世尊往昔

發善提心三具足滿是故得三不可思議偈言

若人天修羅 龍鳩槃荼等 聞佛勝功德

而不解其因 牟尼斷彼疑 故爲說是經

又復何義佛說此經菩薩生於如來種性法種性中
相應示現世尊已示若人得生婆羅門姓若刹利姓
如是之人法性相應若離法種是則卑劣彼人若生
如來種性不離法性若生法性如來種性以滿施等
三種具足若不滿足是則卑劣是故如來如是教言
汝滿具足莫後卑劣偈言

若生善逝性 離過大富樂 天人所禮讚

牟尼王令彼 不離自法義 說此無垢經

又復何義佛說此經若人自謂行於大乘第一堅固
是大衆生唯口教言欲護世間一切衆生學菩薩行
修諸功德而無真實彼如是人如說如行相應饒益
是故如來爲說此經令彼人知修一切行如來世尊
爲彼人說非此菩提唯言語得多種苦行乃得成就
我云何得我於往昔爲取菩提一切行智希望利益
一切衆生彼彼生處種種苦行及種種舍所謂種種
美味飲食種種騎乘坐臥等處園林池水戲樂之處
堂舍田業城邑聚落寶莊嚴具冠髻真珠及毗瑠璃

金寶瓔珞衆寶金剛諸莊嚴具白象牛馬水牛犛羴
莊嚴之具并及所乘諸牛馬等僮僕導從皆以捨施
過去久遠我爾時作一切莊嚴見王身時城邑聚落
國土山川海畔大地并及人民一切樹林種種苗稼
及諸藥草無量華果鮮淨妙寶種種莊嚴諸粟豆等
滿藏財寶布施貧窮又復本作善牙童子我於爾時
所愛妻子捨施不恪又復往昔作善王時滿宮嫫女
有十千數捨施不恪又復往作寶髻王時直闍浮提
上身寶髻妙莊嚴冠脫施不恪又復往作迦施王時
上身愛分捨施不恪又復往作無怨勝王捨身耳鼻

施而不悞又復往作月光王時如青蓮華無垢平滿
廣長好眼蓮華面上自手挑施又復往作華德王時
白淨無垢猶如雷阜及君陀華乳色齒鬘挑施不悞
又復往作善面王時廣妙長薄清淨無垢如蓮華葉
口中舌根自手拔施又復往作給求者王一切世間
貧窮乞人憶念我者念彼心喜以一切珠金等珍寶
巧作自身寶手用施又復往作知足王時以手足施
又復往昔曾作光金閻浮提王捨手足指以用布施
又復往昔作求善語大富王時以愛法故用手足爪
挑自身肉捨以布施又復往昔作示一切饒益王子

自捨身血給與病人又復往作利益仙王割肉截足
捨以布施又復往作居素摩王童子之時破自身骨
脂髓布施又復往昔作尼囉拏童子之時捨心布施
又復往作降惡王時捨大小腸乳肚肝肺胞腎胃膽
脾脂頭腦以用布施又復往作淨藏王時捨自身皮
以用布施又復往作金脇鹿王捨身皮施又復往作
光明王時一切身分分捨施又復往作成就一切
饒益導主一切愛物皆悉捨施臨被殺者復捨自身
而救濟之又復往昔身作僕使捨身供給一切衆生
又復往昔作求善語大富王時高千肘山在上捨身

投大火聚爲善說句法因緣故又復往作一切施王
盡割身肉秤用施與爲救怖畏來歸我者又復往作
不捨王時於彼殺者自捨己身救護饒益又復往作
大悲長者若入城內獄中繫者放令得脫又復往作
作象王時自身作橋度諸衆生又復往作魚龜瞿陀
受一切苦自身忍耐又復往作師子鹿王不惜筋脉
拔濟大衆不護自身救怨家命又復往作悲心仙時
然自身臂失道衆生作明示道又復往作說忍仙時
變鬻割我我救彼怨又復往作不休息堅等住菩薩
他入我舍侵我妻婦有自在力能忍不瞋又復往作

瞿身時畏失命人來至我所我皆安慰自捨愛身又
復往昔作上仙時心愛正法以正法儉無法渴法愛
正法故破身取皮取血取骨書寫法言又復往作者
王童子爲病人故自捨己命與作第一難得之藥而
施與之又復往作勝福德王於破亂世財物傾盡近
怨家所自縛己身以利益他饒益安樂又復往作摩
那婆時在深山中見有餓虎睡寤飢急自捨己身施
令飽滿又復往作精進比丘發勤精進一切智智求
相應行衆生淳熟護正法故一切苦惱種種欺陵能
忍不瞋又復往昔作堅甲時一正遍知正像法中勤

苦持戒如是八萬四千之身如是阿僧祇那由他百
千苦惱我皆作來我以希求一切智智爲欲利益一
切衆生然我不曾退菩提心不墮大乘不捨本願不
緩大甲於菩薩業不生怯弱不曾捨離檀波羅蜜不
曾捨離尸波羅蜜不曾退墮羸提波羅蜜不曾破壞
毗梨耶波羅蜜不曾放捨禪波羅蜜不疲倦修般若
波羅蜜不捨攝法修行一切菩薩之道具足清淨不
錯不謬堅住一切菩薩之地不倦一切菩薩三昧三
摩跋提教諸衆生發菩提心不生疲倦聚集一切菩
提分法非不得恩發行一切菩薩之行堅住不退心

常欲滿一切菩薩諸願法門不生畏懼聚集修行一
切功德不生怯弱何以故一切世間最勝之處一切
所有學與無學辟支佛智所不能證所不能入不能
觀察此佛法名彼不易得若小功德和集修行則不
能得小善根者不能得故如是若人有此宗願我當
成佛是故翹勤修行精進如功德法聚集修行我於
此處希望欲得如是義故佛說此經以何義故名世
尊者彼義今說言世尊者供養義故復有餘義如菩
提心優波提舍彼說應知

何故世尊遊毗舍離大林精舍不餘處者彼義今說

如是難者則不相應隨在何處彼一切處皆有此難
若在餘處不離此難更有餘義如菩提心優波提舍
彼說應知

以何因緣而說如是三種具足不多少者彼義今說
以有三分相對義故以此三種對治貪嫉破戒愚癡
以施具足對治貪嫉以戒具足對治破戒以聞具足
對治愚癡又貪瞋癡以三對治以施具足對治貪心
以戒具足對治瞋心以聞具足對治癡心又復示現
三種福德施具足者示施福德戒具足者正行福德
聞具足者示修福德又復有義一切衆生隨順淳熟

施戒具足一切衆生既淳熟已然後能聞聞已觀察
相應淳熟如是隨順一切衆生淳熟相應是故說三
又復有義二種具足一切佛法聚集住處得不亂法
依止不亂則聞具足如法正覺一切佛法皆具足得
如是一切佛法聚集住處如是因緣是故說三爲當
唯有三種具足爲當更有餘法具足彼義今說如是
三種總攝具足若佛廣說無量具足皆此中攝若大
海慧修多羅中彼言世尊菩薩所有一切具足福德
具足智具足攝應如是知何以故世尊菩薩若修福
德具足以是因緣尊勝富貴復能令他尊勝富貴智

具足故口說善語一切衆生聞者歡喜彼施與戒福
德具足聞智具足如是無違何故菩薩名種姓者彼
義今說有師說言有四種家如來生處如偈說言

諦捨寂靜慧 此四真勝家 正徧知家生

師說言種姓

又善方便是菩薩父般若波羅蜜是菩薩母如彼無
垢名稱經說般若菩薩母方便以爲父一切衆導師
無不由是生菩薩般若波羅蜜者持故如母方便生
者如父生子如父母故說言種姓如是種性父母二
種相似義故又奢摩他毗婆舍那如是種性生正徧

知一切性中此門第一一切善法是性是門如經中
說佛正法中二法雙行彼奢摩他父毗婆舍那母彼
二法種性偈言

毗婆舍那母 奢摩他爲父 生一切菩薩

因毗婆舍那 奢摩他等故 有二切正覺

又復有義諸佛菩薩現前正住三昧大悲此二法是
如來種性因此二法生於如來諸佛菩薩現前正住
三昧爲父大悲爲母又復如是此佛菩薩現前正住
三昧爲父忍菩薩母此是種性偈言

佛菩薩現前 正住三昧父 若大悲戒忍

是菩薩之母

此偈明何義說菩薩種性之義

以何義故名具足者彼義今說推覓衆物處處將來
舉掌積聚計校備辦增益和集故名具足又復多法
和集之義故名具足又復有義荷擔菩提故名具足
如外道齋大會具足初取羊等將來營辦如是菩提
如前具足後菩提覺又復多法說名具足如藥和集
乃得成散如是具足又復有義前種性法堅持不失
復向彼岸如大船舶先知集已後向寶洲又復有義
正負非邪如觀察耳如是之義故名具足又復常修

一切勝行故名具足又具足者欲得出過荷負重擔
出到度義荷負重擔不懈怠義三界過義故名具足
又具足者平等集修平等負修平等修行修平等起修
平等作修平等持修平等住修平等養修故名具足
平等養修者於諸衆生猶如醫師消息病者療治衆
病等負修者六波羅蜜如乘船舶等修行修者如大乘
說等起修者菩薩修學如學射等先正足住等作修
者巧作一切菩薩諸業如巧作師等持修者常無常
等如秤平等住修者一切菩薩能住法舍如堂龕
柱等集修者一切白法如蜜蜂集如是等義故名具

足

又自由義若和合義若或多義若別異義若或廣義若寬博義若或勝義若堅固義若牢固義若和集義若和合義若或物義若或財義若或取義若積聚義若或束義若或媿義故名具足

何故名施彼義今說若破貪貧得大富樂福德具足是故名施施有幾種彼義今說略有三種何等爲三一者資生施二者無畏施三者法施資生施者謂飲食等種種捨施彼資生施色香味勝淨潔如法遠離貪垢無匱悖垢離貪垢者心不慳小如是捨施自手

多施無悖垢者不存富樂如是捨施無畏施者謂能救濟師子虎鼯王賊水等如是諸畏何者法施倒說法者爲之正說次第學句教彼正取廣說則有無量種種聖無盡意說不可量菩薩施業所謂菩薩須食與食卽是布施一切衆生色力壽命安樂辯才

又菩薩施心濁等過皆悉遠離彼濁心施有十四種一者心濁二者先妬三者嫉心四者慢心五者不減慢六者瞋心七者揀擇八者疑心九者惱害十者亂心十一者名十二者依准上法選日時等次第行施十三者懈怠十四者先爲報力如是等法能染心故

名爲濁心心體有濁故名爲濁先妬施者得富樂少
眷屬不愛先嫉施者雖得富樂不樂勝報唯喜下劣
坐臥牀敷止宿等處食飲富樂貪著不離先慢施者
雖得富樂生下劣心不正直先不減慢而布施者
後受報時依他得活如事王人技兒使卒誑惑之人
防邏成護種種驅使平准市官當門守戶放牧畜獸
承事太子下賤官人恐嚇他等博戲等人捫力相撲
如是種種廣設方便強力取物復有勇躍劫賊之人
如是等業以自利益先瞋施者後得大力畜生等身
師子虎豹蛇蟒熊羆饑等中生揀擇施者後得報時

治生田業作子林子若種林人作林等人得少果報
以自存活先疑施者後得果報富樂不常先惱施者
雖得富樂生夷人中若隘陘處若災夔地邊地生等
亂心施者得富樂少或不得果先名施者雖得富樂
得財富已而復喜失依准上法選日時等次第施者
雖受富樂勤苦難得懈怠施者後受富樂雖得不常
先爲報施後雖得報難得而少如是初過菩薩如是
皆悉觀察既觀察已自心清淨淨心生已遠離濁心
離濁心已正信相應悲等功德相應和合自手施與
先信布施得好方便種性力色受勝富樂眷屬自在

名聞辯才安樂色命他不欺陵爲人讚歎第一自在
勝坐臥處止宿等處堂舍莊嚴飲食衣服塗香衆香
色聲味觸得如是等富樂任處

何故名戒彼義今說若能寂靜非法律儀惡不善法
能生善道能得三昧如是名戒戒有幾種彼義今說
略有三種謂律儀戒攝善法戒攝衆生戒彼所謂戒
律儀戒者菩薩正取七種律儀所謂比丘比丘尼式
又摩那沙彌沙彌尼優婆塞優婆夷戒出家在家如
是次第皆律儀攝

何者菩薩攝善法戒菩薩所有善法及戒皆正取已

然後修集大菩提善若身若口若意等善如是略說
攝善法戒又復菩薩何所依止依戒住戒然後修聞
次修思惟後奢摩他毗婆舍那專一樂行如尊長前
正面言語先禮拜已後起合掌時時常爾如是時時
如是尊長敬重供給常於病者悲心供給若聞善語
讚言善哉於功德人說實功德生如是心普爲十方
如彼十方一切衆生一切福德勤心隨喜喜心生已
然後口說於他一切犯觸已者皆能忍受一切所修
身口意善皆悉願取阿耨多羅三藐三菩提時時種
種供養三寶一切種種設供養已口發正願相應精



進常護善分身不放逸口誦學句意念發行藏護根
門食唯知足初夜後夜寤寐相應親近善人依善知
識自識已錯犯過識知見已知改犯佛菩薩諸福德
人盡心懺悔如是等分攝取善法得善法已守護增
長若如是戒是名菩薩攝善法戒

何者菩薩攝衆生戒彼要略說有十一種此義應知
何等十一一者種種饒益衆生種種因緣同事相應
二者衆生病不病等種種諸苦供給伴等三者世間
出世間義如彼法說先示方便先示道理四者報衆
生恩不忘恩報隨所宜護隨報供給五者師子虎王

水火賊等種種畏處護諸衆生六者諸親善友亡失
富樂憂悲殃罪能爲除遣七者貧窮苦惱乞匄衆生
一切所須皆悉給與行善之人依正捨法功德攝取
八者先語問訊後語問訊應時而往九者若他呼喚
取食飲等世間饒益彼此往來以要言之一切所有
不饒益事不可愛行皆悉捨離心隨順轉十者自實
功德心生歡喜公白正取畢竟唱說以潤益心若治
若擯若罰若黜或時驅遣諸如是等不善處擯令住
善處相應饒益十一者以神通力示地獄等毀些不
善令是佛法教化衆生令其歡喜得未曾有又復聖

6
7
8
9
80
1
2
3
4
5
6
7
8
9
80
1
2
3
4
5
6
7
8
9
100
1
2
3
4
5
6

者無盡意說六十七種謂於一切諸衆生所不起惱
害如是等故又菩薩藏修多羅中廣說無量如來戒
故又復此戒無量無邊功德和集如是功德今說少
分所謂戒名出家人戒如大富人身少喜樂於善法
中增長如母於惡法中能護如父如在俗人有財物
故一切饒益皆悉成就出家人戒亦復如是正導如
是如人正行則無衰損如善人所報恩具足如世間
人愛惜身命又如勝智世所讚歎如順王語求解脫
人護戒亦爾欲求解脫當歸依佛欲生善道當歸依
戒安身之本戒是第一知識遇惡善友不捨戒亦如

是欲自利益至死不捨如汝慚愧世人莊嚴如人勝
行不諂爲最如梵行中見柔和勝如欲大貴不幻爲
本如不放逸多饒功德欲證勝法依觀察得如近善
友初中後時希望學人時節如海不可得過如諸衆
生依地而住依戒住持一切勝法如水能潤一切種
子戒能津潤善法種子如火成根如風能令分分開
張如行住物空爲無障欲證果人戒如堅瓶戒如寶
藏如隨所欲擊得之牛如食資糧如人因杖得行住
等如息依命如命慧勝如國有王人所依止如軍有
勇將功德軍衆戒是統將如婦女人一切樂行皆因

夫主如行道人所有資糧若行天道戒是資糧如曠
野行主將善導行善法者戒是前導如大海船若人
方便度生死海以戒爲船如病人藥煩惱病者戒爲
良藥如戰鬪處所有器械共魔王戰以戒遮防如潤
親友不可得捨戒是賢聖如大闇中燈爲照明未來
大闇以戒爲燈如過度河等因橋而度出三惡道諸
方便中戒最爲大如清涼舍能離大熱煩惱大熱戒
能清涼如怖畏者歸依健兒執刀仗者畏惡道人戒
是歸依菩薩之人如住實家善凡夫人如自巳物菩
薩之人如住捨家行道之人如所行道菩薩之人如

住家家得果之人能爲他說菩薩之人如住慧家不
動之人平坦清淨如詣捨直如貪捨施如嫉心人捨
不嫉心如幻僞人心不觀察如沉審人捨離高心如
謹慎人捨放逸過如王有眼無明闇人非其境界八
聖道分解脫相應不觀察人去之甚遠如阿羅漢愛
涅槃去如人自愛如佛出世次第善轉如住正法則
住果證如佛世尊利益自他如僕事主物時方處皆
須相應如人獲得須陀洹果則心安隱如得良時造
作不悔如菩薩願終得解脫如良善田種善種子生
長廣收如時方財因緣具足智色愛樂自多受用如

善根熟則有勢力如自善行自心歡喜如人無罪此
世來世則無所畏如勇健人所依正行戒如正行善
喜自修如修慈者善心安樂如修喜者心常慶悅如
修悲者心則正信如修捨者心常隨順四種正法如
實諦信如世間法障礙寂靜隨順樂行如因聞故則
得辯才如巧語人則無所畏如智明人則有名稱如
善諾人不可破壞如法隨法能成就證得明解脫正
覺之人正道如幢如有智人則能修禪如伴修道如
健因緣則無所畏如山饒寶饒功德寶如海住處多
饒希有如來弟子戒如大海是人道行如信得果如

覺知者依道理行雖曰無水猶能洗浴無根莖葉而
生香物不穿不瑩非金非寶非是真珠而是莊嚴雖
非境界而能生於後世樂報世間人天修羅魔梵一
切沙門婆羅門等之所讚歎非因他樂是得天道涅
槃方便如濟不邪無有泥溺離石礮石如是可度度
信河濟如財物等離種種過如離過道資糧柴薪水
及水泉正直不迴不高不下惡蟲蛇蠍青蠅蚊子寒
熱賊等惡物離道如不須犁不種不熟饒種種田雖
無種樹無藥無林而得美果味如甘露不在高原不
下濕生非餘人作又無人取常新華鬘不乾不燥如

善冷水淋灌却熱雖不防護不器仗闔不與財物不
令怖畏而得樂具常得富樂離諍鬪處如大寶山價
直無量不出於海過大衆畏命畏罰畏不活畏惡道
等畏如影隨身此世後世常與身俱此如是等種種
功德戒相應故

何故名聞彼義今說謂不善法寂靜相應若不能爾
則非義語修多羅等十二部經言語說法是故名聞
聖者無盡意說八十種謂欲修行順心行等
以何義故漏與不漏二種具足得一切智不漏法者
彼義今說智慧觀察唯一味故如蜜蜂王譬如蜂王

種種異物皆作一味菩薩亦爾漏與不漏二種具足
以智慧力皆爲一味又願方便令漏不漏二種具足
得一切智不漏之法如寶積經佛言迦葉譬如諸方
四維等處所有大河并及眷屬一切水聚入大海已
彼一切水平等一味所謂鹹味如是迦葉菩薩如是
以種種門集諸善根願菩提故一切一味所謂皆是
一切智味

施戒聞等幾因緣者彼義今說施具足者二種因緣
一離貧窮二得大富戒具足者二種因緣一離惡道
二生善道聞具足者二種因緣謂離愚癡得大智慧

又復菩薩三種具足自他利益施攝衆生攝衆生已
令住戒聞如是具足他利益行自利成就阿耨多羅
三藐三菩提如是具足自利益行

說三具足何故初施中戒後聞彼義今說依漸次義
示現佛法如彼大海譬如大海次第漸深佛法亦爾
初說布施中戒後聞又復有義在家菩薩食等施已
彼後時聞出家功德聞已深信捨家出家既出家已
方得淨戒以住戒故離世間業得無上聞是故在後
說聞具足又復有義上生次第菩薩最初自他饒益
是故行施彼布施已次行何者如是思惟世尊說戒

及持戒人復有何者次第相應此則說聞以要言之
施具足者世尊示現檀波羅蜜戒具足者尸波羅蜜
聞具足者忍進禪慧波羅蜜示又復有義施戒示現
福德具足聞智具足又復有義施戒具足示障礙道
聞具足者示無礙道

三具足經優波提舍
音釋

胞

匹交切與脬

腎

時忍切水藏也

脾

類彌切土藏也

肘

陟柳切臂節也

筋

同水府也

脉

筋舉欣切骨絡也

夔

力究切肉也

膈

翹企切

船

魚傑切

船

魚傑切

船

大摘古岳切

夔

居縛切

監

監烏懈切

夔

胡夾切

夔

魚傑切

魚傑切

6 7 8 9 80 1 2 3 4 5 6 7 8 9 80 1 2 3 4 5 6 7 8 9 100 1 2 3 4 5 6

三具足經優波提舍

夔黜尺律切聲古候切取
也 取 疆 石也 歙 許濁切
也 取 疆 石也 歙 許濁切

較譌 第十四紙 南作處 俱作種姓

三具足經優波提舍計字八千一百一十

弘法會松江信士馮大助施刻併板紙銀三兩六

錢五分

印分

松江信士徐爾鉉施寫銀四錢零五厘祈

先室宋氏淨根塵而入法界遊樂土以悟無生

信士徐洵承閔抱香庵祖璿對

崇禎甲申孟夏松江弘法會貴州赤水釋繼慶較識

三具足經優波提舍翻譯記

施戒聞三備攝衆行是以如來說各具足法門深邃

淺識未窺天親菩薩慈心開示唯顯經義弗釋章句

是故名爲優波提舍昔出中國今現魏都三藏法

毗目智仙婆羅門人瞿曇流支愛敬法入沙門曇林

於鄴城內在金華寺興和三年歲次辛酉月建在戊

朔次庚午十三日譯千百十言

驃騎大將軍開府儀同三司御史中尉勃海高仲密

啓請供養守護流通



三具足經優波提舍

卷一

6
7
8
9
80
1
2
3
4
5
6
7
8
9
80
1
2
3
4
5
6
7
8
9
100
1
2
3
4
5
6

三上尺餘傳...

秋蘭對琴亭題詞

思歸大棘軍開市蕭同三同騰史中保侍武官中密

何大與十三日...

秋襟袂內垂金華手與呼三五漁火半西日...

御日昏山變羅門人墨墨或支囊始去人也門...

吳對谷為對苑野舍昔出中國今既馳潘三...

商贈未窺天野昔勤慈心開示聖臨臨舞舞兼...

蘇海開三尚潘泉珍其以吹來筠吾具只去門...

三具只對苑野舍騰驛...

六廿九

